

2019 Wasserratta

Dr Morandi tuat, über d'Fasnacht schriiba
wür gschieder dia Zitt, mit sin'am Ross vertrieba
am Radio häsch'na au schu ghört,.....mit Verlaub
bisch fascht froh – wärsch a Momentli taub!

Han mi entschlossa – dr Job eifach ds'künda
um d'Welt ds bereisa – mit da beschta Fründä
wenn ds Ersparta – brucht isch kumm'i hei
noch mina Berechniga – wär's mora geg'di Zwei !

Jo d'Klima-Erwärmig macht üs ds Läba schwär
d'Folga drus_ussa – sind halt schu prekär
au mini Frau hät gseit sie hegi do Bedengga
kann i a 30 Grad Wösch – au bi 40 Grad usahengga ?

Vum Usgang grad heikho,
händ gsoffa ganz nett,
ma putzt no schnell Zähnli,
und goht denn ins Bett,
am Morga erwacht'ma,
a Fremda im Bett,
Sie würd gära wüssa,
ob Sie a Dreier kha hett ?

Mina Sohn bringt z'erschta Mol a Fründin hei
as isch a herzigs Ding mit Ella-Langa Bei
Do wäggslat d'Mama ds Lintuach us als het's grad blitzt
Nid das sie schwanger wird –wenn sie zerscht' Mol sitzt !

Politikerbehaupten – und lügen sich nu a
als Bürger bisch – do eifach niana dra
Fake News stönd – au schu in dr Bibel
eis Rätsel bliibt – d'Funktion vum Josef sinem Schniedel !

Zwei Schwiegermüatt'ra – sind mitanand go bada
im'na tüüfa See – in dr Nöchi vu Samada
ohje dia Einti – isch doch glatt versoffa
und vu'r Andara – kömmer's halt nu hoffa !

Dr Stadtrat Tom kunnt überall druss
luagt im Büro vum Roli zum Fenschter us
Du dia mim orangä Gwändli, sind das üsri?
Dr Roli meint i glaubs jo nid
das Du dia kennsch das isch dr Hit
Doch was sich do bewegt sind nu Mohnbluama !

Nu Mohnbluama
nu Mohnbluama
nu Mohnbluama
nu Mohnbluuuuamaaaa !

Au üs Männer, tuat's heissa Klima plooga
ohni Verhüaterli, sött'ma's gar nid wooga
jetz stell Diar vor – wia miar denn tüand rottiara
wenn sich dä Gummi – bi dära Hitz tuat reduziara !

Bim Flüüga müand alli – ob Fraua oder Männer
sogar dr Trump, muass ds Klota dur da Scanner
dr Scanner meldat – dr Donald dä törf mit
kasch luaga wia'd'witt – a Bomba isch das nit !

Dr Papst Franziskus loht sich zimli uf d'Äscht ussa
verfechtat alti Zöpf und kann aso guat Pfuusa
aber Frauapriester würden Kircha nid nu spalta
dr Biichtstuhhl wür sich – zum Tratsch-Treff entfalta !

I sitza vor'am Fernseh
as Piarli in dr Hand
als Rentner witt au wüssa
was lauft im Schwizerland
ma gseht nu Diskussiona
das kann's doch gar nid sii
«Holt mich hier raus, ich bin ein Star»
do wirsch jo grad zum Schwii !

Jo, wend alt bisch häsch nüd ds lacha
au ds Konto isch fascht leer
alti Menscha gönd vergessa,
ds Läba isch nu schwer
drumm tüand doch au studiara,
was ihar im Alter wend,
hey, intressiart eui nu wiaso,
Küha kei Hörner hend ?

Am Wiahnachtsmarkt – tuat d'Heilsarmee jo singa
und viel'na Menscha – Muat und Troscht au bringa
hend dia ächt Aktzia – nid'nu_bi_Gottes_Gnada
sind's drumm am Singa – bim «Muja» vor'am Lada ?

Wenn im Dorf zum Dokter muasch goht das nid heimlich
wäg'em Dataschutz wird's öppa richtig peinlich
im Wartezimmer rüafen's nümma noch dr Frieda,
nai as heisst – jetz kunnt dia dra, mit Hämmoriida !

Weisch – wia schön isch's frühaner gsii,
miar – hend törfa Männer sii,
kei Stress – topfit – Usgang – viel Zitt
so isch's frühaner eifach gsii

Am Obig kocht denn d'Frau
und gletta tuat si au
hät au viel Zitt – für andri Sacha
Jetz isch das halt verbii
überall sin's hüt derbii
muass d'Frauquota denn sii ?